

摘藻堂四庫全書薈要

集部

欽定四庫全書薈要

御選唐宋詩醇卷四十三

山陰陸游詩二

目錄

十月十九日與客飲忽記去年此時自錦屏歸山
南道中小獵今又將去此矣

長門怨

斷碑歎

蜀酒歌

醉後草書歌詩戲作

十二月初一日得梅一枝絕竒戲作長句今年於是四賦此花矣

十二月十一日視築隄

游修覺寺

塞上曲

苦筍

月下作

過大蓬嶺度繩橋至杜秀才山莊

東湖新竹

夏日湖上

同何元立賞荷花追懷鏡湖舊遊

怡齋

龍湫歌

蒸暑思梁州述懷

古意

寓驛舍

題宇文子友所藏薛公鶴

晨至湖上

聽琴

龍眠畫馬

山中得長句戲呈周輔并簡朱縣丞

長歌行

遊三井觀

臨別成都帳飲萬里橋贈譚德稱

丈人觀

儲福觀

離堆伏龍祠觀孫太古畫英惠王像

登灌口廟東大樓觀岷江雪山

平羌道中望峩眉山慨然有作

次韻何元立都曹贈行

初到榮州

醉中懷眉山舊遊

齋中夜坐有感

晚登橫溪閣

高齋小飲戲作

太液黃鵠歌

夜聞浣花江聲甚壯

謁諸葛丞相廟

醉中長歌

春感

花時遍遊諸家園

題明皇幸蜀圖

春殘

對酒

遊圓覺乾明祥符三院至暮

食齋

幽居晚興

書歎

月下醉題

銅壺閣望月

夜宴即席作

芳華樓夜宴

歲晚

數日寒頓減頗有春意感懷賦短歌

梅花

萬里橋江上習射

出塞曲

偶過浣花感舊遊戲作

樓上醉書

初春出遊

張園海棠

登劍南西川門感懷

眉州作

江樓

訪楊先輩不遇因至石室

感秋

白鶴館夜坐

南津勝因院亭子

書寓舍壁

御選唐宋詩醇卷四十三目錄

欽定四庫全書薈要卷一萬九千三百六十七

集部

御選唐宋詩醇卷四十三

山陰陸游詩二

十月十九日與客飲忽記去年此時自錦屏歸山
南道中小獵今又將去此矣

去年縱獵韓壇側玉鞭自探南山雪今年痛飲蜀江邊
金盃却吸我眉月竹枝歌舞新教成淒怨傳得三巴聲
城頭築觀出雲雨峨眉正與闌干平酒酣詩就擲盃去

醉蹋玻璃江上路懸知幽磽斷橋邊已有梅花開半樹
長門怨

寒風號有聲寒日慘無暉空房不敢恨但懷歲莫悲今
年選後宮連娟千蛾眉早知獲譴速悔不承恩遲聲當
徹九天淚當達九泉死猶復見思生當長棄捐

忠厚悱惻深於言怨

斷碑歎

原註興元姚節度園以折碑為石筍文猶可識蓋梁蕭懿墓碑簡文為太子時撰書

法適美
可愛

二蕭同起南蘭陵正如文叔與伯升至今人悲大蕭死
齋恨不見梁家興崇崇之陵久為谷豈惟羣盜分珠玉
斷碑槎枒棄道邊文字班班猶可讀剝剝苔蘚一悽然
俯仰人間幾變遷世人作碑君勿哂千載園林須石筍
簡峭

蜀酒歌

漢州鸞黃鸞鳳雛不鷲不搏德有餘眉州玻瓈天馬駒
出門已無萬里塗病夫少年夢清都曾賜虛皇碧琳腴

文德殿門晨奏書歸局黃封羅百壺十年流落狂不除
遍走人間尋酒壚青絲玉瓶到處酤鸞黃玻璃一滴無
安得豪士致連車倒瓶不用盃與盃琵琶如雷聒坐隅
不愁渴死老相如

醉後草書歌詩戲作

朱樓矯首隘八荒綠酒一舉累百觴洗我堆阜崢嶸之
胸次寫為淋漓放縱之詞章墨翻初若鬼神怒字瘦忽
作蛟螭僵寶刀出匣揮雪刃大舸破浪馳風檣紙窮擲

筆霹靂響婦女驚走兒童藏往時草檄喻西域颯颯聲

動中書堂

原註余嘗草丞相魯公以下與夏國主書於政事堂

一收朝迹忽十載

西掠三巴窮夜郎山川荒絕風俗異賴有美酒猶能狂
醉中自脫頭上幘綠髮未許侵微霜人生得喪良細事
孰謂老大多悲傷

醉墨淋漓暢然滿志忽移高調淒焉改色矣柴升所謂
浸淫奔放於詞翰之中以遂其放浪蕭散不溺不溜之
槩者取諸此也

十二月初一日得梅一枝絕竒戲作長句今年於是四賦此花矣

高標已壓萬花羣尚恐嬌春習氣存
月兔擣霜供換骨湘娥鼓瑟為招魂
孤城小驛初飛雪斷角殘鐘半掩門
盡意端相終有恨夜寒皴玉倩誰溫
梅花詩最為難工中四語頗有逸致

十二月十一日視築隄

江水來自蠻夷中五月六月聲摩空
巨魚穹龜牙鬚雄

欲取闌市為龍宮橫隄百丈卧霽虹始誰築此東平公
今年樂哉適歲豐吏不相倚勇赴功西山大竹織萬籠
船舸載石來無窮橫陳屹立相疊重置力尤在水廟東
我登高原相其衝一盾可受百箭攻蜿蜿其長高隆隆
截如長城限羗戎安得椽筆記始終挿江石崖堅可礮

游修覺寺

上盡蒼崖百級梯詩囊香椀手親携山從飛鳥行邊出
天向平蕪盡處低花落忽驚春事晚樓高剩覺客魂迷

興闌掃榻禪房卧清夢還應到剡溪

潘問竒曰第三句真登臨妙語

祖應世曰曲江有一水雲際飛之句竟陵評云若入
俗手定作一雲水際飛矣此領聯若作鳥從山邊出
更有何味

塞上曲

三尺鐵如意一枝玉馬鞭笑把出門去萬里行無前當
道何崔嵬云是玉門關方當置屯守征人何時還馬色

如雜花鎧光若流水肅肅不敢譁遙望但塵起日落戍
火青煙重塞垣紫回首五湖秋西風開芡觜

蟠竒氣於簡古著鮮華於老健不徒作悲涼語氣體絕
似太白

苦筍

藜藿盤中忽眼明駢頭脫襁白玉嬰極知耿介種性別
苦節乃與生俱生我見魏徵殊媚嫵約束兒童勿多取
人才自古要養成放使干霄戰風雨

周密曰世傳涪翁喜苦筍嘗從斌老乞苦筍詩云南園苦筍味勝肉籜龍稱寃莫採錄煩君更致蒼玉束明日風雨吹成竹嘗賦苦筍云苦而有味如忠諫之可活國放翁又從而獎之云我見魏徵殊媚嫵約束兒童勿多取於是世以諫筍目之殊不知翁嘗自跋云余生長江南里人喜食苦筍試取而嘗之氣苦不可於鼻味苦不可於口故嘗屏之未始為客一設及來黔中黔人各掘苦筍萌於土中才一寸許味如蜜

蔗初春則不食惟楚道人食苦筍四寸餘曰出土尺
餘味猶甘苦相半以此觀之涪翁所食乃取其甘非
貴於苦也

月下作

畏暑不巾襪步月搯短筇瘦身髮鬢髻顧影如孤松徑
幽螢開闔池漲魚唼喁飛泉穿北垣珠玉相撞春東湖
更竒絕百畝銀初鎔但能抱琴往絕恨欠鶴從重露傾
荷盤微風墮芙蓉歡言美清夜縹緲吹踈鐘空中飛僊

人粲然冰雪容笑我老塵世不記瑤臺逢

清麗寄意處妙無迹相

過大蓬嶺度繩橋至杜秀才山莊

度笮臨千仞梯山躡半空濕雲朝暮雨陰壑古今風亭
觀參差見闌干詰曲通柳空叢篠出松偃翠蘿蒙負籠
銀釵女鉏菑鶴髮翁何由有餘俸小築此山中

東湖新竹

插棘編籬謹護持養成寒碧映淪漪清風掠地秋先到

赤日行天午不知解籜時聞聲簌簌放梢初見葉離離
官閒我欲頻來此枕簟仍教到處隨

集中詩類此者頗多往往膾炙人口然領聯不過斷句
工巧作者佳處殊不在此今擇其華淨少累者存之以
備一體其有句無篇者汰之若矜尚字句之巧以為得
放翁家法所謂微之之識砭砭耳

夏日湖上

烏帽筇枝散客愁不妨胥吏雜沙鷗迎風枕簟平欺暑

近水簾櫳探借秋茶竈遠從林下見釣筒常向月中收
江湖四十餘年夢豈信人間有蜀州

同何元立賞荷花追懷鏡湖舊遊

少狂欺酒氣吐虹一笑未了千觴空涼堂下簾人似玉
月色泠泠透湘竹三更畫船穿藕花花為四壁船為家
不須更踏花底藕但嗅花香已無酒花深不見畫船行
天風空吹白紵聲雙槳歸來弄湖水往往湖邊人已起
即今憔悴不堪論賴有何郎共此尊紅綠踈踈君勿歎

漢嘉去歲無荷者

怡齋

東湖仲夏草樹荒屋古無人亭午涼萱房微呀不見日
筍籜自解時吹香野藤蟠屈入窗罅濕茵扶踈生屋梁
跨溝數椽最幽翳漲水及檻雨敗墻靜涵青蘋舞藻荇
閒立白鷺浮鴛鴦芙蓉雖瘦亦瀟漫照眼翠蓋遮紅妝
水紋枕簟欲卷却團團素扇嬾復將天風忽送埴鈴語
喚覺清夢遊瀟湘

龍湫歌

環湫巨木老不花淵淪千尺龍所家爪痕入木欲數寸
觀者心掉不敢譁去年大旱綿千里禾不立苗麥垂死
林神社鬼無奈何老龍欠伸徐一起隆隆之雷浩浩風
倒卷江水傾虛空鱗間出火作飛電金蛇夜掣層雲中
明朝父老來賽雨大巫吹簫小巫舞祠門人散月娟娟
龍歸抱珠湫底眠

須臾慰滿三農望歛却神功寂若無此詩亦有其意

蒸暑思梁州述懷

宣和之末予始生遭亂不及遊司并從軍梁州亦少慰
土脉深厚泉流清季秋嶺谷浩積雪二月草木初抽萌
夏中高涼最可喜不省舉手驅蟲蟲藏冰一出賣滿市
玉璞堆積寒崢嶸柳陰夜卧千駟馬沙土露宿連營兵
胡笳吹隋漾水月烽燧傳到山南城最思出甲戌秦隴
戈戟徹夜相摩聲兩年劍南走塵土肺熱煩促無時平
荒池昏夜蛙閣閣食案白日蠅營營何時王師自天下

雷雨瀕洞收欖槍老生衰病畏暑濕思卜鄆杜開柴荆
古意

紕足飼飢鷹鷹飽意未平伏櫪豈不安老驥終悲鳴士
生固欲達又懼徒富貴素願有未伸五鼎澹無味茅屋
秋雨漏稻陂春水深長歌傾濁酒舉世不知心

身分極高語亦落落入古

寓驛舍

原註予三至成都皆館於是

閒坊古驛掩朱扉又憩空堂綻客衣九萬里中鯤自化

一千年外鶴仍歸
遶庭數竹饒新筍
解帶量松長舊圍
惟有壁間詩句在
暗塵殘墨兩依依

題宇文子友所藏薛公鶴

仙人騏驥絕世稀
卵生凡禽似而非
宮保妙筆窮化機
縞衣玄裳真令威
千年華表聊一歸
回首幸脫乘軒譏
喙吞不恨菰米微
從吾曹遊安得肥

晨至湖上

園古逢秋好身閒
與嬾宜空堂賞踈
豁重閣望參差竹

粉有新意松風含古姿
低回慙祿米官事少於詩

聽琴

踈簾曲檻蘋風涼
細腰美人藕絲裳
綠藤水紋穿矮牀
玉指纖纖彈履霜
高林鶯囀日正長
幽澗泉鳴夜未央
哀思不怨和而莊
有齊淑女禮自防
世人但惑青樓倡
琵琶瑩篴雜胡羌
試聽一曲醒汝狂
文姬指法傳中郎
於韓歐蘇黃諸家外
自樹一幟泠泠清音
欲滿人耳視
諸子正未肯作邾莒

龍眠畫馬

國家一從失西陲年年買馬西南夷瘴鄉所產非權竒
邊頭歲入幾番皮崔嵬瘦骨帶火印離立欲不禁風吹
圉人太僕空列位龍媒汗血來何時李公太平官京師
立仗慣見渥洼姿斷縑歲久墨色暗逸氣尚若不可羈
賞竒好古自一癖感事憂國空餘悲嗚呼安得毛骨若
此三千匹銜枚夜度桑乾磧

文集跋韓幹馬大駕南幸將八十年秦兵洮馬不復

可見志士所共嘆也觀此畫使人作關輔河渭之夢
殆欲賈涕矣

山中得長句戲呈周輔并簡朱縣丞

鶴鳴山空無鶴來青霞嶂深天壁開千巖角逐互吞吐

一峯拔起矜崔嵬日光微漏潭見底

原註青霞嶂碧玉潭皆霧中佳處

水氣上薄雲成堆幽禽飛鳴報客至竒樹璀璨知誰栽
花藤怪蔓白晝暗犇猿落狄無時哀路窮尚躡一千級
忽見密竹藏樓臺共言神僧昔住此至今光景如天台

搢筇負笠出復沒喜動婦人驚提孩高人何至作狡獪
無乃翫世聊相誼不然學道窮實際詎捨正大崇竒瓌
儒林丈人學擅世餘事尚壓蔡與崔名山未死可再到
此士一失難重陪贊府摘山事如織擺撥領客何竒哉
境幽神愴不可住歸倩玉手傳金杯

原註朱君有侍
兒許為客出

唐書劉建鋒傳高郁教馬殷教民得自摘山收茗算
募高戶置邸閣居茗

長歌行

人生不作安期生，醉入東海騎長鯨。
猶當出作李西平，手梟逆賊清舊京。
金印煌煌未入手，白髮種種來無情。
成都古寺卧秋晚，落日偏傍僧窗明。
豈其馬上破賊手，哦詩長作寒螿鳴。
興來買盡市橋酒，大車磊落堆長餅。
哀絲豪竹助劇飲，如鉅野受黃河傾。
平時一滴不入口，意氣頓使千人驚。
國讐未報壯士老，匣中寶劍夜有聲。
何當凱還宴將士，三更雪壓飛狐城。

遊三井觀

三井久知名暇日偶一訪棟宇壞欲盡基址尚閱壯畫
牆皆國工煙雲儼天仗旌旄亞戈戟佩玉雜弓韞太古
實傑作筆落九天上吳生名擅世睥睨未肯讓規模遠
有考意象豪不放最竒老癯仙骨立神愈王石恪雖少
怪用筆亦跌宕兩妹澹蛾眉非復火食狀塵埃久侵蝕
風雨無蓋障好事未易逢寧能久亡恙雍洛劫火餘妙
迹盡凋喪斯遊恐難繼佇立增悄愴

因畫生慨妙得子美家法筆力樸堅亦復相近

臨別成都帳飲萬里橋贈譚德稱

成都城南萬里橋
蘆根蘋末風蕭蕭
映花碾草鈿車小
駐坡驀澗青驄驕
入門翠徑絕窈窕
臨水飛觀何岌嶢
判無功名著不朽
惟仗詩酒寬亡聊
迎霜早已足雉兔
微冷便欲思狐貂
喜者縷膾映盤箸
恨欠斫蟹加橙椒
坐中譚侯天下士
龍馬毛骨矜超遙
烏犀白紵謫僂樣
但可邂逅不可招
今年一戰馘餘子
風送六翮凌青霄
美人再拜乞利市
醉墨飛落生鮫綃
我衰於世百無用

十年不趁含元朝華纓肯傍蕭颯鬢寶帶那束龍鍾腰
祝君好去事明主日望分喜來漁樵遊談引類亦細事
寄酒且解相如消

丈人觀

黃金篆書扁朱門夾道巨竹屯蒼雲崖嶺劃若天地分
千柱兢兢壓其垠纓冠肅謁丈人君廣殿空庭吹寶熏
摩挲畫橋手為鞍異哉山菟與土籟物怪齶齶冠丘墳
仙人佩玉雜悅怱手整貂冠最不羣欲去不忍恨日曛

道翁采藥晝夜勤松根茯苓獲兼斤人之植立彊骨筋
狗杞羣吠聲狺狺山爐小甑吹幽芬朱顏不飲常自醺
我亦宿誦五千文一念之差隨世紛逝將從翁走如麋
隱書秘訣何由聞

硬語排摹自見妥帖

本集七律自註丈人觀孫太古畫范長生作舉手整
貂蟬像神氣尤竒逸

儲福觀

原註唐玉真公
主修真之地

路轉屏風疊雲藏帝子家窮幽行犖确息倦倚槎枒綠
鮮封茶樹清霜折藥花世無勾漏令誰此養丹砂
不少新色亦逼唐調

離堆伏龍祠觀孫太古畫英惠王像

岷山導江書禹貢江流蹴山山為動嗚呼秦守信豪傑
千年遺迹人猶誦決江一支溉數州至今禾黍連雲種
孫翁下筆開生面岌業高冠摩屋棟徒木遺風雖峭刻
取材尚足當世用寥寥後世豈乏人尺寸未施讒已衆

要官無責空賦祿軒蓋傳呼真一閔竒勲偉績曠世無
仁人志士臨風慟我游故祠九頓首夜遇神君了非夢
披雲激電從天來赤手騎鯨不施鞚

以騷人之才發志士之感獨立蒼茫自詠詩正使生平
蘊結藉此一攄

登灌口廟東大樓觀嶠江雪山

我生不識栢梁建章之宮殿安得我冠侍遊宴又不及
身在滎陽京索間擐甲橫戈夜酣戰胷中迫隘思遠遊

沂江來倚岷山樓千年雪嶺闌邊出萬里雲濤坐上浮
禹迹茫茫始江漢䟽鑿功當九州半丈夫生世要如此
齋志空死能無歎白髮蕭條吹北風手持卮酒酹江中
姓名未死終磊磊要與此江東注海

平羌道中望峩眉山慨然有作

白雲如玉城翠嶺出其上異境忽隨前心目久蕩漾別
來二百日突兀喜無恙飛僊遙舉手喚我一稅鞅此行
豈或使屏迹事幽曠何必故山歸更破萬里浪

王士禛曰九盤山臨青衣江遙望大峩秀出天半雲
嵐萬狀積雪晶然中峩如偃僂少峩如拱揖北來諸
山蜿蜒起伏爭趨峩下放翁詩白雲如玉城翠嶺出
其上異境忽墮前心目久蕩漾身未到此不知語意
之工

次韻何元立都曹贈行

原註元立用陳後山送蘇公詩韻

嘉榮東西川此別不為遠徘徊凌雲守決去未遽忍登
高望故人煙樹參差見懸知今日夢不隔重城鍵平生

相從意百年有未滿結巢青城雲期子在歲晚

澄澹入古

初到榮州

亂山缺處城樓呀雙旗蕭蕭晚吹笳煙深綠桂臨絕壑
霜落殘瀨鳴寒沙廢臺已無隱士嘯遺宅尚有高人家
鈴齋下榻約僧話松陰枕石放吏衙盃羹最珍慈竹筍
餅水自養山薑花地爐堆獸爇石炭瓦鼎號蚓煎秋茶
少年遠遊無百里一飢能使行天涯豈惟慣見蓬婆雪

直恐遂泛星河槎故巢肯作兒女戀異境會向鄉閭誇
一盃徑醉憤自墮燈下髮影看鬢髮

醉中懷眉山舊遊

勁酒少和氣哀歌無歡情故鄉不敢思登高望錦城錦
城那得去髣髴墓頤路遙知尊前人指我題詩處我雖
流落夜郎天遇酒能狂似少年想見東郊攜手日海棠
如雪柳飛綿原註漢嘉術者袁牧童謂
予明年春分後當還西州

如瓶瀉水如珠走盤想見酒間揮灑之樂

齋中夜坐有感

荒山為城溪作壕風鼓巨木聲翻濤
鷓臬乘屋彈不去狐狸欺人怒豎毛
雨來紅鶴更可惡爭巢一似嬰兒號
城孤屋老草木茂正坐人少此輩豪
急呼五百具畚鍤欲掀窟穴窮腥臊
忽然語罷却自笑殘年何至與汝麈
浣花江色綠如黛春波灩灩浮輕舸
行當繫纜柳陰下仰聽鶯語傾香醪

晚登橫溪閣

樓鼓聲中日又斜
憑高愈覺在天涯
空桑客土生秋草
野渡虛舟集晚鴉
瘴霧不開連六詔
俚歌相答帶三巴
故鄉可望應添淚
莫恨雲山萬疊遮

淒其欲絕哀厲彌長
被之歌喉可以繞梁三日

高齋小飲戲作

梅花又發鬼門關
坐覺春風萬里寬
荔子陰中時縱酒
竹枝聲裏強追歡
丁年漢使殊方老
子夜吳歌昨夢殘
白帝夜郎俱不惡
兩公補處得憑欄

原註予五年
間自夔客榮

太液黃鵠歌 有引

漢始元元年春二月黃鵠下建章宮太液池中公卿
上壽賜諸侯王列侯宗室金錢子夜讀漢書追作歌
一首

建章宮裏春風寒太液水生池面寬中人馳奏黃鵠下
龍旗豹尾臨池看芹香藻暖鵠得意左右從官呼萬歲
須臾傳詔宴公卿歡聲如雷動天地時平宮省遊樂多
黃鵠刷羽涵恩波小臣珥筆龍墀下願繼前朝天馬歌

託興深遠承靈威兮障外國猶是夜度桑乾之意

夜聞浣花江聲甚壯

浣花之東當笮橋犇牛齧橋橋為搖分洪初疑兩蛟舞
觸石散作千珠跳壯聲每挾雷雨橫巨勢潛借鼉鼉驕
夢回聞之坐太息鐵衣何日東征遼銜枚度磧沙颯颯
盤槩斷隴風蕭蕭不然投檄徑歸去短篷卧聽錢塘潮

謁諸葛丞相廟

原註彌牟八陣原上

漢終四百天所命老賊方持太阿柄區區梁益豈足支

不忍安坐觀異姓遺民亦知王室在閔位那干天統正
公雖已沒有神靈猶假賊手誅鍾鄧前年我過沔陽祠
再拜奠俎哀淚迸潔齋請作送迎詩精忠大義神其聽
能道孔明心事辭意警絕善於包舉

醉中長歌

闌干斗柄搖天東人間一夜回春風注桃染柳歲相似
惟我衰顏非昔紅可憐逢春不自感更欲使氣驚兒童
煙郊射雉錦臆碎水亭供膾金盤空歸穿南市萬人看

流星突過連錢驄
高樓作歌醉自寫
墨光燭焰交長虹
人生未死貴適意
萬里作客原非窮
故人夜直金鑾殿
偃卧獨聽宮門鐘

春感

少時狂走西復東
銀鞍駿馬馳如風
眼看春去不復惜
只道歲月來無窮
初遊漢中亦未覺
一飲尚可傾千鍾
又魚狼藉漾水濁
獵虎蹴蹋南山空
射堠命中萬人看
毬門對植雙旗紅
華堂却來弄筆硯
新詩醉草誇坐中

劍闕南山纜幾日壯氣摧縮成衰翁雪霜蕭颯已滿鬢
蛟龍鬱屈空蟠胸隣園杏花忽爛漫推枕彊起隨遊蜂
遶看百匝幾嘆息吹紅洗綠行忽忽莫年逢春尚有幾
常恐春去尋無踪青銅三百尚可辦且判爛醉酤郢筒
花時遍遊諸家園

宣華無樹著啼鶯惟有摩訶春水生故老能言當日事
直將宮錦裹宮城

於海棠寓荒淫之警獨有深味

題明皇幸蜀圖

天寶政事何披猖使典相國捐忠良弄權楊李不足怪
阿瞞手自裂紀綱八姨富貴尚有理何至詔書褒五郎

原註天寶末下詔
雪張易之兄弟

盧龍賊騎已洶洶丹鳳神語猶琅琅

人知大勢危纍卵天稔竒旣如崩牆臺省諸公獨耐事
歌詠功德卑虞唐一朝殺氣橫天末足馬西奔幾不脫
向來謫子知幾人賊前稱臣草間活劍南萬里望秦天
行殿春寒聞杜鵑老臣九齡不可作魚蠹蛛絲金鑑篇

筆墨老橫有如高牙大纛堂堂正正摧堅而折銳一結
尤得立言之旨

春殘

石鏡山前送落暉春殘回首倍依依時平壯士無功老
鄉遠征人有夢歸首宿苗侵官道合蕪菁花入麥畦稀
倦遊自笑摧頽甚誰記飛鷹醉打圍
盧世灌曰項聯有髀肉復生之慨

對酒

閒愁如飛雪入酒即消融好花如故人一笑盃自空流
鶯有情亦念我柳邊盡日啼春風長安不到十四載酒
徒往往成衰翁九環寶帶光照地不如留君雙頰紅

遊圓覺乾明祥符三院至暮

成都再見春事殘雖名閒官實不閒門前車馬鬧如市
案上文檄高於山有時投罇輒徑出略似齊客偷秦關
日斜僕夫已整駕顧景欲駐愁嘲訕豈知今朝有此樂
放浪一笑開衰顏抽身黃塵烏帽底得意翠木清泉間

褰裳危磴窮華朶洗耳古礪聽淙潺豈惟頓覺宇宙廣
政爾一散腰脚頑似聞青城縹緲處待我歸綴仙官班
俊鷹解條即萬里豈比倦翼方知還

食齋

小著鹽醯助滋味微加薑桂發精神風鑪歛鉢窮家活
妙訣何曾肯授人

小有風致

幽居晚興

借鉏劔藥喜微香汲井澆花趁晚涼胸次何曾橫一物
尊前尚欲笑千場錦江秋雨芙蓉老笠澤春風杜若芳
歸去自佳留亦樂夢中何處是吾鄉
行雲流水之趣眼前語頗能道出

書歎

三代藏寶器世守參河圖埋湮則已矣可使列市區文
章有廢興蓋與治亂符慶歷嘉祐間和氣扇大鑪數公
實主盟渾灝配典謨開闢始歐王留畬逮曾蘇大駕初

渡江中原皆避胡吾猶及故老清夜陪坐隅論文有脉
絡千古著不誣俯仰四十年綠髮霜蓬枯孤生尊所聞
秉節不敢渝久幽士固有速售理則無世方亂珉玉吾
其老江湖

文章與時隆汙自古而然後生小子徇規矩而改錯豈
知老成之有淵源耶太白歎大雅久不作少陵云文章
千古事高情遠識可以並讀

文集答邢司戶書近時頗有不利場屋者退而組織

古語剝裂奇字大書深刻以眩世俗讀之使人面熟
此等果可言文章乎如唐韓氏柳氏吾宋歐氏王氏
蘇氏以文章擅天下者徒以在場屋時苦心耗力凡
陳言淺說之可病者已知厭棄如都市之玉工珉玉
雜治積日既久望而識之矣一旦取荆山之璞以為
黃琮蒼璧萬乘之寶珉豈可復欺耶凡今不利場屋
而名古之文者往往多未嘗識珉者也又安知玉哉

月下醉題

黃鵠飛鳴未免飢此身自笑欲何之閉門種菜英雄老
彈缺思魚富貴遲生擬入山隨李廣死當穿塚近要離
一樽強醉南樓月感慨長吟恐過悲

盧世灌曰三四自是壯語

銅壺閣望月

銅壺閣上看明月身在千尋白銀闕十年肺渴今夕平
皓然胸次堆冰雪恨無仙掌出雲表更取墜露和玉屑
夜闌三嘆下危梯明日人間火雲熱

夜宴即席作

宣華輦路牧羊牛，摩訶龍池草茫茫。
宮殿犁盡餘繚牆，南風遠吹禾黍香。
草間白骨橫秋霜，何由喚起醕一觴。
癡人走死聲利場，我獨感此惜流光。
蘋花開時風榭涼，美人縹緲如鸞翔。
堯年舜日樂未央，非子之故為誰狂。
芳華樓夜宴

射虎將軍老不侯，尚能豪縱醉江樓。
笙歌雜沓娛清夜，風露高寒接素秋。
少日壯心輕玉塞，暮年幽夢墮滄洲。

人間清絕沅湘路常笑靈均作許愁

歲晚

歲晚城隅車馬稀偷閒聊得掩荆扉
征蓬滿野風霜苦多稼連雲雁鷺肥
報國有心空自信結茅無地竟安歸
浣花道上人誰識華表千年老令威
頷聯真風人語歎惋無盡妙有含蓄

數日寒頓減頗有春意感懷賦短歌

微陰寒不力破臘春暗動
林梢報梅白水際聞鳥哢羈

鴻漸整翮一一勞目送應憐飛蓬客猶作浣花夢平生
江淮間裘馬事豪縱豈知老畏死齋鉢受蔬供忍饒每
自笑小飲未敢痛何以慰寂寥卧聽壓春甕

梅花

冰崖雪谷木未芽造物破荒開此花神全形枯近有道
意莊色正知無衰高堅政要飽憂患放棄何遽愁荒遐
移根上苑亦過計竹籬茅屋真吾家平生自嫌亦自許
妙處可識不可誇金尊翠杓未免俗篝火為試江南茶

另開生面全是寓言

萬里橋江上習射

坡隴如濤東北傾胡牀看射及春晴風和漸減雕弓力
野迥遙聞羽箭聲天上欖槍端可落草間狐兔不須驚
丈夫未死誰能料一竒他年下百城

出塞曲

佩刀一刺山為開壯士大呼城為摧三軍甲馬不知數
但見動地銀山來長戈逐虎祁連北馬前曳來血丹臆

却回射雁鴨綠江箭飛雁起連雲黑清泉茂草下程時
野帳牛酒爭淋漓不學京都貴公子唾壺塵尾事兒嬉
偶過浣花感舊遊戲作

憶昔初為錦城客醉騎駿馬桃花色玉人携手上江樓
一笑鈎簾賞微雪寶釵換酒忽徑去三日樓中香未滅
市人不識呼酒仙異事驚傳一城說至今西壁餘小草
過眼年光如電掣正月錦江春水生花枝缺處小舟橫
閒倚胡牀吹玉笛東風十里斷腸聲

樓上醉書

丈夫不虛生世間本意橫槩收河山豈知蹭蹬不稱意
八年梁益凋朱顏三更撫枕忽大叫夢中奪得松亭關
中原機會嗟屢失明日茵席留餘潛益州官樓酒如海
我來解旗論日買酒酣博塞為歡娛信手梟盧唱成采
牛背爛爛電目光狂殺自謂元非狂故都九廟臣敢忘
祖宗神靈在帝旁

縱筆直書却有沈鬱頓挫之妙范成大贈游云高興餘

飛動孤忠有照臨非虛語也

初春出游

春風初來滿刀州江水照人如潑油犢車芳草南陌頭
家家傾貲事遨遊萬里橋西繫黃騮為君一登散花樓
半年長齋廢觥籌興來忽典千金裘小桃婀娜弄芳柔
紅蘭茁芽滿春洲壚邊女兒不解愁鬪草纔罷還藏鈎
可憐世人自拘囚盜中乾坤舞蜉蝣百年苦短去日遒
問君安用萬戶侯

張園海棠

洛陽春信久不通
姚魏開落胡塵中
揚州千葉昔曾見
已歎造化無餘功
西來始見海棠盛
成都第一推燕宮
池臺掃除凡木盡
天地眩轉花光紅
慶雲隋空不飛去
時有絳雪縈微風
蜂蝶成團出無路
我亦狂走迷西東
此園低樹猶三丈
錦繡却在青天上
不須更著刀尺裁
乞與齊奴開步障

不著凡語為海棠
生色從來咏海棠
者多矣以此為最

登劍南西川門感懷

自古高樓傷客情，更堪萬里望吳京。
故人不見莫雲合，客子欲歸春水生。
瘴癘連年須藥石，退藏無地著柴荆。
諸公勉畫平戎策，投老深思看太平。

盧世灌曰：此首極似杜陵讀者自辨之。

眉州作

扁舟久不泛，暮津常恐黃塵解。
污人爛醉破除千日懣。

原註：予不至眉山三年矣。

狂吟判斷四州春。

原註：此行自成都歷永康唐安至眉山。

汀

洲漸歎蘋花老風露初嘗荔子新
便欲騎鯨東海去勝遊未忍別峩岷

江樓

急雨洗殘瘴江邊閒倚樓
日依平野沒水帶斷槎流
擣紙荒村晚呼牛古巷秋
腐儒憂國意此際入搔頭
隨意詠懷不覺近杜其由來深矣

訪楊先輩不遇因至石室

訪客客已去追涼成獨行
衣冠嚴漢殿草木拱秦城
古

甃蒼苔滑空庭落日明出門還憶恍列屋打碑聲

原註
塙東

即石
經堂

感秋

西風繁杵擣征衣客子關情正此時萬事從初聊復爾
百年彊半欲何之畫堂蟋蟀怨清夜金井梧桐辭故枝
一枕淒涼眠不得呼燈起作感秋詩

王士禎曰玉階蟋蟀開清夜四語小說載此為蜀中
某驛卒女詩故翁見之納以為妾為夫人所逐又有

卜算子詞不合畫春山依舊留愁住云云按劍南集
此詩乃放翁在蜀時所作本七律玉階作畫堂開作
怨後人稍竄易數字輒傳會或收入閨秀詩可笑也

白鶴館夜坐

竹聲風雨交松聲波濤翻我坐白鶴館燈青無晤言廓
然心境寂一洗吏卒喧袖手哦新詩清寒愧雄渾屈宋
死千載誰能起九原中間李與杜獨招湘水魂自此競
摹寫幾人望其藩蘭苔看翡翠煙雨啼青猿豈知雲海

中九萬擊鵬鷗更闌燈欲死此意與誰論

此與書歎一篇見此老識力亦後學良則所以為南渡之冠

南津勝因院亭子

南江平無風如鏡新拂拭漁舟不點破
潏潏千頃碧闌干西北角雲散山爭出
坡陀競南走翠入窗戶窄江山不世情
作意娛此客豈無尊中酒豪飲非宿昔
明當還成都塵土埋馬迹後巖在眼中
飛去無羽翼

原註後巖在鳳凰山

後七八里山
水尤奇絕

書寓舍壁

天與癡頑不解愁
未埋病骨且閒遊
山於拄杖橫時看
路到芒屨破處休
初擬燒丹住南嶽
却因學劍客西州
秋風中褐添蕭爽
又作臨邛十日留



御選唐宋詩醇卷四十三

總纂官
金鑑會
對寶

總校官庶吉士臣張能照

校對官中書臣王瑄

謄錄貢生臣湯安泰

欽定四庫全書薈要

集部

御選唐宋詩醇卷四十四

詳校官原任主事_臣李斯咏



欽定四庫全書薈要

御選唐宋詩醇卷四十四

山陰陸游詩三

目錄

西巖翠屏閣

雨中山行至松風亭忽澄霽

贈宋道人

獵罷夜飲示獨孤生

秋晚登城北門

莫秋

數日暄妍頗有春意予閑居無日不出遊戲作

江樓醉中作

曳策

謁漢昭烈惠陵及諸葛公祠宇

大雪歌

訪客至西郊

夜寒

故蜀別苑在成都西南十五六里梅至多有兩大樹夭矯若龍相傳謂之梅龍予初至蜀嘗為作詩自此歲常訪之今復賦一首丁酉十一月也

閑意

書雨

莫冬夜宴

謁石犀廟

江上散步尋梅偶得絕句

大醉梅花下走筆賦此

廣都江上作

道室夜意

城南王氏莊尋梅

遊諸葛武侯書臺

眉州披風榭拜東坡先生遺像

南定樓遇急雨

舟中對月

涪州道中

北巖

忠州禹廟

龍興寺弔少陵先生寓居

遊萬州岑公洞

萬州放船過下巖小留

楚城

舟出下牢關

峽口夜坐

初到荊州

阻風

小雨極涼舟中熟睡至夕

岳陽樓

黃鶴樓

白雪堂登四望亭因歷訪蘇公遺跡至安國院

舟行蘄黃間雨霽得便風有感

長風沙

登賞心亭

將至京口

泝谿

冬夜聞雁有感

月夕

自雲門之陶山肩輿者失道行亂山中有茅舍小

塘極幽邃求見主人不可意其隱者也

園中雜書

池亭夜賦

雙清堂夜賦

橋南納涼

初秋夢故山覺而有作

別建安

紫谿驛

月巖

聞雁

春雨

南窓睡起

感舊絕句

夏日晝寢夢遊一院閒然無人簾影滿堂惟燕蹋
箏弦有聲覺而聞鐵鐸風響璆然殆所夢也邪因
得絕句

書懷絕句

雨後極涼料簡篋中舊書有感

秋夜

雨夜

豐城高安之間憩民家景趣幽邃為之慨然懷歸
寄奉新高令

予欲自嚴買船下七里灘謁嚴光祠而歸會灘淺
陸行至桐廬始能泛江因得絕句

辛丑正月三日雪

雪霽歸湖上過千秋觀少留

題山家壁

憶昔

秋夜

九月三日泛舟湖中作

新寒

湖村月夕

橫塘

蔬圃

五雲門晚歸

夜汲井水煮茶

寄朱元晦提舉

乍晴風日已和泛舟至扶桑埭徘徊西村久之

攜瘦尊醉梅花下

城西接待院後竹下作

幽居春夜

晨起

春遊

八月十四日夜湖山觀月

夜聞秋風感懷

草書歌

夜泊水村

自妙相歸將至杜浦堰舟中作

御選唐宋詩醇卷四十四目錄

欽定四庫全書薈要卷一萬九千三百六十八

集部

御選唐宋詩醇卷四十四

山陰陸游詩三

西巖翠屏閣

把酒孤亭半日留
西巖獨擅鶴山秋
也知絕境終難賦
且喜閑身得縱遊
鶻起危巢時磔磔
鹿鳴深澗暮呦呦
人生適意方為樂
甲第朱門祇自囚
五六造語幽絕寂
歷之境宛然在目

雨中山行至松風亭忽澄霽

煙雨千峰擁髻鬟
忽看青嶂白雲間
卷藏破墨營丘筆
却展將軍著色山

贈宋道人

我不如昔人騎鶴上九天
玉簡奏事虛皇前
平生嗇養氣麤全
兩脚馳走輕如煙
鳥道懸崖忽飛騫
戲擲短劍聲鏗然
轉盼跳下千仞淵
已復取劍升層巔
騰猿俊鷗爭後先
飢食松花掬飛泉
金骨綠髓漸凝堅
口哦七字

黃庭篇西來欲訪挾彈僊丹經劍訣更精研嗟哉一失
五百年作詩付子勿妄傳

獵罷夜飲示獨孤生

白袍如雪寶刀橫醉上銀鞍身更輕帖草角鷹掀兔窟
憑風羽箭作鷗鳴關河可使成南北豪傑誰堪共死生
欲疏萬言投魏闕燈前攬筆涕先傾

直從胸臆流出如聞撫髀之歎

秋晚登城北門

幅巾藜杖北城頭，卷地西風滿眼愁。
一點烽傳散關信，兩行雁帶杜陵秋。
山河興廢供搔首，身世安危入倚樓。
橫槊賦詩非復昔，夢魂猶繞古梁州。

神似少陵

莫秋

時序中年速風霜，客路長孤愁。
巴月白清夢，楚山蒼燈暗。
秋銜壁鐘疎，夜殷床端居。
有微祿不敢恨，殊方

數日暄妍頗有春意，予閑居無日不出遊戲作

小春花蕾索春饒，已有暄風入紫貂。
村路雨晴鳩婦喜，射場草綠雉媒驕。
苑邊結客飛金勒，樓上誰家弄玉簫。
莫怪夕陽歸獨後，早梅喚我度谿橋。

原註蜀宣華苑在摩訶池上

江樓醉中作

淋漓百榼宴江樓，秉燭揮毫氣尚遒。
天上但聞星主酒，人間寧有地理憂。
生希李廣名飛將，死慕劉伶贈醉侯。
戲語佳人頻一笑，錦城已是六年留。

原註退之詩云越女一笑三年留

曳策

原註遊房園作

慈竹蕭森拱廢臺醉歸曳策一徘徊紛紛落日牛羊下
黯黯長空霰雪來三峽猿催清淚落兩京梅傍戰塵開
客懷已是淒涼甚更聽城頭畫角哀

觸緒即來自是此翁忠悃與杜陵無二賞其氣之蒼老
謁漢昭烈惠陵及諸葛公祠宇

雨止風益豪雪作雲不動淒涼漢陵廟衰草卧翁仲畫
妓空笙竽土馬闕羈鞚壤沃黃犢耕柏密幽鳥哢尚想
忠武公身任社稷重整整渭上營氣已無岐雍少須天

意定破賊寧患衆興亡信有數星隕事可痛陵邊四五

家茆竹居接棟手皸紙上箔

原註居民皆以造紙為業

醅熟酒鳴甕

雖嗟生理微亦足逭飢凍劉葛固雄傑閱世均一夢論
高常近迂才大本難用九原不可作再拜臨風慟

潘問竒曰事未必然聊為孔明吐氣

大雪歌

原註累日作雪竟不成戲賦此篇

長安城中三日雪潼關道上行人絕黃河鐵牛僵不動
承露金盤凍將折虬鬚豪客狐白裘夜來醉眠寶釵樓

五更未醒已上馬衝雪却作南山遊
千年老虎獵不得
一箭橫穿雪皆赤
挈空爭死作雷吼
震動山林裂崖石
曳歸擁路千人觀
髑髏作枕皮蒙鞍
人間壯士有如此
胡不來歸漢天子

一腔豪氣千古奇
文覺希逸雪賦直是兒女情
多風雲
氣少

訪客至西郊

撼撼敗葉飛黯黯寒雲低
村墟與市里觸目一慘悽
今

日病體輕駕言適城西丹柿滿野店青帘出江隄獵騎
載雉兔樵檐懸鷄雞居人各自得使我念故谿故谿不
敢說況復朝金閨傷哉齧雪翁歲晚猶牧羝下愚不自
還大惑終身迷君恩何由報力耕愧黔黎

夜寒

清夜焚香讀楚詞寒侵貂褐歎吾衰輕冰滿研風聲急
忽記山陰夜雪時

故蜀別苑在成都西南十五六里梅至多有兩大

樹夭矯若龍相傳謂之梅龍予初至蜀嘗為作詩
自此歲常訪之今復賦一首丁酉十一月也

昔年曾賦西郊梅茫茫去日如飛埃即今衰病百事懶
陳迹未忘猶一來蜀王故苑犁已遍散落尚有千雪堆
朱樓玉殿一夢破煙蕪牧笛遺民哀兩龍卧穩不飛去
鱗甲脫落生莓苔精神最遇雪月見氣力苦戰冰霜開
羈臣放士耿獨立淑姬靜女知誰媒摧傷雖多意愈厲
直與天地爭春回蒼然老氣壓桃杏笑我白髮心尚孩

微風故為作嫵媚一片吹入黃金罍

詩以言情賦物而情不至不足以為詩羈臣放士耿獨立淑姬靜女知誰媒蓋亦黯然自傷矣

閑意

柴門雖設不曾開為怕行人損綠苔妍日漸催春意動
好風時捲市聲來學經妻問生疎字嘗酒兒斟澁盃
安得小園寬半畝黃梅綠李一時栽

書雨

仲冬候始寒丙夜天正黑雨來挾風助吼擊不遺力聲
如拔高山勢若伐強國初憂老栢折遂恐石筍踣乾坤
本無心百神各効職蛟龍鬪歲暮豪橫理莫測農功幸
已成龍怒亦會息屋漏何足言袖手姑默默
信手拈來輒成竒語中間接筆尤為健絕

暮冬夜宴

官機錦茵金蹙鳳舞娃釵墮雙鬢重寶爐三尺香吐霧
畫燭如椽風不動主人愛客情無已箏聲未斷歌聲起

亦知百歲等朝露便恐一歡成覆水
爐紅酒綠春為回
坐上梅花連夜開
堂前咫尺異氣候
冰合平池霜壓階
妙於諷諭風人之遺

謁石犀廟

閑過石犀祠登堂一歎歎
江回陵谷變碑斷市朝非

原註

有王蜀時
修廟碑銘

荒圃連寒壠斜陽映夕霏
興亡俱昨夢惆悵

跨驢歸

江上散步尋梅偶得絕句

小南門

原註萬里橋門
一名小南門

外野人家短短疎籬繚白沙紅

稻不須鸚鵡啄清霜催放兩三花

大醉梅花下走筆賦此

閉門坐歎息不飲輒千日忽然酒興生一醉須一石擔
頭花易老旗亭酒常窄出郊索一笑放浪謝形役把酒
梅花下不覺日既夕花香襲襟袂歌聲上空碧我亦落
烏巾倚樹吹玉笛人間奇事少頗謂三勅敵酒闌江月
上珠樹挂寒壁便疑從此僊朝市長掃迹醉歸亂一水

頓與異境隔終當騎梅龍海上看春色
風流清興如在目前

原註梅龍蓋蜀苑中故物也

廣都江上作

微波不搖江織雲不行天我來倚杖立天水相澄鮮平
遠望不盡日落自生煙梅花耿獨立雪樹明前川好風
吹我衣春色已粲然東村聞酒美買醉上漁船

道室夜意

寒泉漱酒醒午夜誦仙經茶鼎聲號蚓香盤火度螢齋

心守玄牝閉目得黃寧寄語山中友因人送茯苓

黃庭經何不食氣太和精故能不死入黃寧注即黃庭也

城南王氏莊尋梅

涸池積槁葉茆屋圍疎籬可憐庭中梅開盡無人知寂
寞終自香孤貞見幽姿雪點滿綠苔零落尚爾奇我來
不須晴微雨正相宜臨風兩愁絕日暮倚筇枝

骨格不凡

遊諸葛武侯書臺

沔陽道中草離離卧龍往矣空遺祠當時典午稱猾賊
氣喪不敢當王師定軍山前寒食路至今人祠丞相墓
松風想像梁甫吟尚憶幡然會三顧出師一表千載無
遠比管樂盖有餘世上俗儒寧辦此高臺當日讀何書
警策語故不在多

眉州披風榭拜東坡先生遺像

蜿蜒回顧山有情平鋪十里江無聲孕奇蓄秀當此地

鬱然千載詩書城高臺老仙誰所寫仰視眉宇寒崢嶸
百年醉魂吹不醒飄飄風袖筇枝橫爾來逢迎厭俗子
龍章鳳姿我眼明北扉南海均夢耳謫墮本自白玉京
惜哉畫史未造極不作散髮騎長鯨故鄉歸來要有日
安得春江變酒從公傾

南定樓遇急雨

行遍梁州到益州今年又作度瀘遊江山重複爭供眼
風雨縱橫亂入樓人語朱離逢峒獠棹歌欸乃下吳舟

天涯住穩歸心嬾登覽茫然却欲愁
屬對之妙神韻自然不可湊泊

舟中對月

百壺載酒遊凌雲醉中揮袖別故人依依向我不忍別
誰似峨眉半輪月月窺船窓挂淒冷欲到渝州酒初醒
江空裊裊釣絲風人靜翩翩葛巾影哦詩不睡月滿船
清寒入骨我欲仙人間更漏不到處時有沙禽背船去

涪州道中

遠客喜歸路清遊逾昔聞
雨添山翠重舟壓浪花分
洛叟經名世張侯勇冠軍
原註郡境有伊川先生故居及張翼德祠
懷人不可覲袖手對爐熏

北巖

原註有程正叔先生祠堂

艤船涪州岸攜兒北巖遊
搖檝橫大江褰裳躡高樓
雨昏山半失江漲地欲浮
老矣寧再來為作竟日留
烏帽程丈人閉戶本好修
駭機一朝發議罪至竄投
黨禁久不解胡塵暗神州
修怨以稔禍哀哉誰始謀
小人無遠

略所懷在私讐後來其鑑茲賦詩識巖幽
持論嚴正所見者大集中如此等作於君子小人之分
判若黑白足以觀其所處矣

忠州禹廟

古郡巴蠻國空山夏禹祠
鴉歸暗庭栢巫拜薦江蘼
草蔓青緣壁苔痕紫滿碑
欲歸頻悵望回棹夕陽時
雖非橘柚龍蛇之比亦老氣無敵

龍興寺弔少陵先生寓居

中原草草失承平
戍火胡塵到兩京
扈蹕老臣身萬里
天寒來此聽江聲

雙管齊下一寫兩枝

張完臣曰草草二字狀盡衰世景象謂之咏少陵可謂之自咏亦可

遊萬州岑公洞

原註岑公隋時人居此二十年得道仙去

大業征遼發閭左
軍興書檄煎膏火
此時也復有閑人
自引巖泉拾山果
後六百歲吾來遊
洞中正夏淒如秋

乳石床平可坐卧，水作珠簾月作鈎。
十年神遊八極表，浮名坐覺秋豪小。
試問岑公迎我不，鶴飛忽下青松杪。
萬州放船過下巖，小留

畫船四月滿旗風，飲散匆匆鷓首東。
醉裏偏憐江水綠，意中已想荔枝紅。
斷碑零落莓苔遍，幽澗淙潺略彀通。
一足寧無好東綃，憑誰畫此碧玲瓏。

楚城

江上荒城猿鳥悲，隔江便是屈原祠。
一千五百年間事

只有灘聲似舊時

王士禎曰歸州在江北山巔江南有楚臺山山上有
楚王臺及舊秭歸城三閭大夫實產是鄉王龜齡詩
城郭舊為夔子國人民多是楚王孫陸放翁詩江上
荒城猿鳥悲隔江便是屈原祠一千五百年間事只
有灘聲似舊時何仲默詩古郡山頭數家住客舟江
上一燈明竹枝慣聽巴人曲鳥道纔通楚國程荒山
寒日江聲怒號獨坐吟此數詩不必猿鳴三聲淚霑

裳也

張完臣曰聲味都盡而語氣不斷此之謂詩

舟出下牢關

大舸凌驚濤飛度青玉峽虛壁雲濛濛陰洞風颯颯拂
天松蓋偃入水山脚插炎曦忽摧破亭午手忘策懸知
今夜喜月白宿沙夾曠哉七澤遊盟鷗不須歆

押韻皆穩

峽口夜坐

三峽至此窮兩壁猶峭立估船無時行婦盍有夜汲風
生樹影動月碎水流急草根綴微露螢火飛熠熠吾行
已四旬纔抵楚西邑浩歌散鬱陶還舟覺衣濕

初到荊州

萬里泛仙槎歸來鬢未華蕭蕭沙市雨淡淡渚宮花斷
岸添新漲高城咽晚笳船窓一樽酒半醉落烏紗

阻風

沙市三日風萬鼓鳴船頭欲去不得發卧對青燈幽聽

兒誦離騷可以散我愁微言入孤夢恍與屈宋遊睡起
銅瓶響欣然喚茶甌吾道無淹速風伯非所尤

小雨極涼舟中熟睡至夕

舟中一雨掃飛蠅半脫綸巾卧翠藤清夢初回窓日晚
數聲柔艣下巴陵

盧世淮曰只末一句有多少蘊含在

岳陽樓

身如病鶴短翅翎雨雪飄灑號沙汀天風忽吹不得住

東下巴峽泛洞庭軒皇張樂雖已矣此地至今朝百靈
雄樓岌業鎮吳楚我來舉手捫天星帆檣纜放已隱隱
雲氣亂入何冥冥鼉鼉出沒蛟鱓橫浪花遮盡君山青
黃衫仙翁喜無恙袖劔近到城南亭眼前俗子敗人意
安得與翁同醉醒

黃鶴樓

手把仙人綠玉枝吾行忽及早秋期蒼龍闕角歸何晚
黃鶴樓中醉不知江漢交流波渺渺晉唐遺跡草離離

平生最喜聽長笛裂石穿雲何處吹

別出機軸邈然清篋結語運化入妙幾於滅盡針線之迹

自雪堂登四望亭因歷訪蘇公遺迹至安國院

我醉飛屐登孱顏拄杖出沒風煙間三山葱隴鮫鰐靜
九關肅穆虎豹閑幾年金骨煉綠髓此日始得窮躋攀
老僊歸侍紫皇案空有野水流淙潺蜿蜒翠阜圍綠野
似嶺非嶺山非山向來龍蛇滿雪壁雷電下取何時還

名花亦已天上去居人指似題詩處九十一翁不識公

我抱此恨知無窮

原註定惠院已廢海棠亦不復在安國老僧景滋年九十一自言東坡去

黃後四年方生

舟行蘄黃間雨霽得便風有感

天青雲白十分晴帆飽舟輕盡日行江底魚龍貪晝睡
淮南草木借秋聲好山縹渺何由住華髮蕭條只自驚
莫怪時人笑踈嬾宦情元不似詩情

長風沙

江水六月無津涯
驚濤駭浪高吹花
艣聲已出雁翅浦
荻夾喜入長風沙
長風自古三巴路
檣竿參差雜煙樹
南船北船各萬里
淒涼小市相依住
歌呼雜沓燈火明
黃昏風死浪亦平
勞苦舟師剩沽酒
安穩明朝到池口

登賞心亭

蜀棧秦關歲月道
今年乘興却東遊
全家穩下黃牛峽
半醉來尋白鷺洲
黯黯江雲瓜步雨
蕭蕭木葉石城秋
孤臣老抱憂時意
欲請遷都涕已流

將至京口

卧聽金山古寺鐘三巴昨夢已成空
船頭坎坎回帆鼓
旗尾舒舒下水風
城角危樓晴靄碧
林間雙塔夕陽紅
銅瓶愁汲中濡水
不見茶山九十翁

原註頃在京口嘗取中濡水寄曾文

清公

泝谿

射的峰前禹廟東
短蓬三扇卧衰翁
閑攜清聖濁賢酒
重試朝南莫北風
水落痕留紅蓼節
雨來聲滿綠蒲叢

衝煙莫作匆匆去擬看溪丁下釣筒

冬夜聞雁有感

從軍昔戍南山邊傳烽直照東駱谷軍中罷戰壯士閑
細草平郊恣馳逐洮州駿馬金絡頭梁州毬場日打球
玉杯傳酒和鹿血女真降虜彈箜篌大呼拔幟思野戰
殺氣當年赤浮面南遊蜀道已低摧猶據胡牀飛百箭
豈知蹭蹬還江邊病臂不復能開弦夜聞雁聲起太息
來時應過桑乾磧

豪邁一往壓倒高岑

月夕

開戶滿庭雪徐看知月明微風入叢竹復作雪來聲俗
塵不待掃凜然肝肺清村深無漏鼓鶴唳報三更
以雋語寫幽致列子御風冷然善也

自雲門之陶山肩輿者失道行亂山中有茅舍小
塘極幽邃求見主人不可意其隱者也

陂池幽處有茅堂井白蕭條草樹荒小鴨怯波時聚散

病疏傷蠹半青黃
童兒衝雨收魚網
婢子聞鐘上佛香
我亦暮年思屏迹
數椽何計得連牆

園中雜書

殘花委地筍掀泥
香椀詩囊到處攜
幽夢欲成誰喚覺
半窓斜日鷓鴣啼

池亭夜賦

池上小亭幽清宵
秉燭遊荷盤時瀉
露螢火早知秋有
感歲時速無聲河
漢流殊方不堪住
歸夢繞滄洲

雙清堂夜賦

陸子病少間獨卧谿上堂人靜魚自躍風定荷更香素
月行中天流螢失孤光歸鳥飛有聲度此十里塘嗟我
獨何事遲暮客異鄉太息搔短髮起視夜未央

妙於體物流螢失孤光與螢火早知秋各有妙理風定
荷更香風定池蓮自在香亦復各成妙句前後三詩不
妨並存

橋南納涼

曳杖來追柳外涼
畫橋南畔倚胡牀
月明船笛參差起
風定池蓮自在香
半落星河知夜久
無窮草樹覺城荒
碧筒莫惜頽然醉
人事還隨日出忙

初秋夢故山覺而有作

陂水白茫茫
草煙濕霏霏
牧童一聲笛
落日無餘暉
遙山已漸隱
村巷亞竹扉
老翁延我入
苦謝柿栗微
幸逢歲有秋
一醉君勿違
念此動中懷
命駕吾將歸

一別建安

歌帽揚鞭晚出城驛亭燈火向人明多情葉上蕭蕭雨
更把新涼送客行

紫谿驛

原註信州鉛山縣

雲外丹青萬仞梯木陰合處子規啼嘉陵棧道吾能說
略似黃亭到紫谿

筆有天趣此作運化工部下篇又用太白皆極鑪錘之
妙

月巖

幾年不作月巖遊
萬里重來已白頭
雲外連娟何所似
平羌江上半輪秋

淡淡自合刻劃即失之矣

聞雁

過盡梅花把酒稀
熏籠香冷換春衣
秦關漢苑無消息
又在江南送雁歸

張完臣曰可謂深至

春雨

冬旱土不膏愛此春夜雨四郊農事興老穉迭歌舞相
呼長沮耕分喜樊遲圃豐年已在目亭障靜桴鼓我歸
未有期一官寄倉庾幸復寬簡書不敢恨羈旅

平平寫去淡雅可愛豐年十字抵得一篇喜雨亭記

南窓睡起

夢中忘却在天涯一似當年錦里時狂倚寶箏歌白紵
醉移銀燭寫烏絲酒來郫縣香初壓花送彭州露尚滋
起坐南窓成絕嘆玉樓乾鵲誤歸期

盧世淮曰三四俊爽自是佳句

晝漏迢迢暑氣清不妨小倦帶餘醒夢從隴客聲中斷
愁向湘屏曲處生風度簾旌紅浪颭窻明香岫碧雲橫
閑情賦罷憑誰寄悵望壺天白玉京

感舊絕句

鵝黃酒邊綠荔枝

原註鵝黃廣漢酒
名綠荔枝出叙州

摩訶池上納涼時

冰紈不畫驂鸞女却寫江南白紵辭

盧世淮曰有世外音響當於空際遇之

夏日晝寢夢遊一院閒然無人簾影滿堂惟燕蹋
箏弦有聲覺而聞鐵鐸風響璆然殆所夢也邪因
得絕句

桐陰清潤雨餘天
簷鐸搖風破晝眠
夢到畫堂人不見
一雙輕燕蹴箏絃

書懷絕句

不到天台三十年
草菴猶記宿雲邊
老僧曉出松門去
手挈軍持取澗泉

絕句源出樂府但取神韻趣在有意無意之間唐人推青蓮龍標二家擅場作者妙處深得風人之致視唐殆無愧色此不可以時代拘者也

雨後極涼料簡篋中舊書有感

日暎小雨不至晡雨雖未足涼有餘細泉泠泠咽幽竇
清吹策策驚高梧笠澤老翁病蘇醒欣然起理西齋書
十年燈前手自校行間顛倒黃與朱區區樸學老自信
要與萬卷歸林廬爾來世俗好變古鑿空飾詐無根株

愀然撫几三太息力薄抱恨何由祛
蘭臺漆書非已責
且為籤牒除蠹魚

秋夜

湖海秋初到房櫳夜轉幽露濃驚鶴夢月冷伴蛩愁生

計依微祿年光墮遠遊巖灘已在眼早晚放孤舟

原註
去年

欲自三衢舟行泛七里瀨
歸山陰今竟當為此行也

雨夜

庭院蕭條秋意深銅爐一炷海南沈幽人聽盡芭蕉雨

獨與青燈話此心

豐城高安之間憩民家景趣幽邃為之慨然懷歸
數家聚雲根細路入叢薄濺濺石渠水來往一略約有
無鄰里通笑語婦子樂濁醪時相就青蔬缺鹽酪日暮
歸閉門績火星煜爚先期畢租稅老不入城郭嗟予獨
何事早插紅塵脚故山未成歸悵望有餘忤

寄奉新高令

小雨催寒著客袍草行露宿敢辭勞歲饑民食糟糠窄

吏惰官倉鼠雀豪只要閭閻寬箠楚不須亭障肅弓刀
九重屢下丁寧詔此責吾曹未易逃

此真良二千石矣察吏恤災安民弭盜奉公任職八句
中色色具到却一氣渾成不冗不腐風雅遺軌何可多
得鶴林玉露載王十朋真德秀二詩命意雖同而氣格
相去遠矣

予欲自嚴買船下七里灘謁嚴光祠而歸會灘淺
陸行至桐廬始能泛江因得絕句

桐廬縣前艣聲急蒼煙茫茫白鳥雙亂山日落潮未落
勝絕不減吳松江

風格絕佳

辛丑正月三日雪

開歲尚殘冬佳哉雪意濃潤歸千里麥聲亂五更鐘簾
隙收初密牆隅積已重龍團笑羔酒狐腋襲駝茸危檻
臨歌竹幽牕聽墮松忽思西戍日憑堞待傳烽

原註予
從戎日

嘗大雪中登興元城上
高興亭待平安火至

龍團笑羔酒用陶穀事妙於不覺

雪霽歸湖上過千秋觀少留

縱轡不嫌遠逢山猶一登夕陽陂渺渺殘雪塔層層折
竹橫遮道饑鳥下啄冰欲歸還小駐倚杖對峻嶒

題山家壁

山中無傳漏猿鳴知既夕芳藤上幽援素月照高壁主
人殊喜事歡若有夙昔稚子槃竹槃炊黍持餉客卜鄰
雖未辦清嘯聊自適衰病久廢詩筆端歎荆棘

憶昔

憶昔浮江發劔南夕陽船尾每相銜
楠陰暗處尋高寺

荔子紅時宿下巖

原註高寺在瀘州下巖在雲安軍

硤口烹猪賽龍廟

沙頭伐鼓挂風帆區區陳迹何由記
惟有征塵尚滿衫

秋夜

秋氣侵帷夢不成一燈西壁翳還明
風高露井無桐葉
雨急煙村有雁聲擊筑誰同燕市飲
賃春方作會稽行
從來自許知何等堪歎江湖白髮生

涼風又落南宮木老雁孤鳴漢北州不及領聯之含蘊
九月三日泛舟湖中作

兒童隨笑放翁狂又向湖邊上野航魚市人家滿斜日

菊花天氣近新霜重重紅樹秋山晚獵獵青帘社酒香

隣曲莫辭同一醉十年客裏過重陽

原註予自庚寅至辛丑始見九日於

山故

新寒

病怯新寒欲不禁南牕擁褐夜悒悒江湖跌宕送餘日

書劍蕭條孤壯心
杜曲新愁隨斷雁
遼陽遺恨入疎砧
此懷擬向何人說
賴有昏燈伴苦吟

湖村月夕

客路風塵化素衣
閑愁冉冉鬢成絲
平生不負月明處
神女廟前聞竹枝

盧世淮曰色相俱空

橫塘

橫塘南北埭西東
拄杖飄然樂未窮
農事漸興人滿野

霜寒初重雁橫空參差樓閣高城上寂歷村墟細雨中
新買一蓑苔樣綠此生端欲伴漁翁

原註是日偶買蓑衣甚妙

蔬圃

山翁老學圃自笑一何愚
硤瘠財三畝勤劬賴兩奴
正方畦畫局微潤土融酥
翦闢荆榛盡鉏犁磊塊無過溝
橫略約聚甃起浮屠
原註拾園中瓦礫作小塔
隙地成瓜援餘功及
芋區如絲細生菜似鴨爛
蒸壺此事今真辦東歸不為

鱸

排比瑣事點染閑情雖云遊戲亦斐亶可觀

五雲門晚歸

高城帶遠林落日動寒砧行客自朝暮青山無古今衰
遲慙逸氣憂患足危心溪迳滯歸艇何時春水深
以高韻勝置盛唐人集中不復可辨

夜汲井水煮茶

病起罷觀書袖手清夜永四鄰悄無語燈火正淒冷山
童亦睡熟汲水自煎茗鏘然輓轆聲百尺鳴古井肺腑

凜清寒毛骨亦蘇省歸來月滿廊惜踏疎梅影

寄朱元晦提舉

市聚蕭條極村墟凍餒稠勸分無積粟告糴未通流民
望甚饑渴公行胡滯留徵科得寬否尚及麥禾秋

惻然仁者之言四十字不愧古人羅大經謂文公於詩
獨取放翁以其氣質渾厚殆未足以盡之

宋史文公本傳淳熙七年浙東大饑易提舉浙東常
平茶鹽事即日單車就道移書他郡募米商蠲其征

比至部米已輻輳與僚屬鈞訪民隱至廢寢食雖深山窮谷拊存不遺事竣宰相王淮贊於上曰熹荒政乃行其所學民被實惠

乍晴風日已和泛舟至扶桑埭徘徊西村久之

十日風雨今日晴衰病忽減思閑行接羅一幅煙霧薄
舴艋八尺鳧鷖輕亭亭孤塔遠天碧曲曲深巷斜陽明
數家茅屋門晝掩不聞人聲聞碓聲身似龐公不入城
東阡南陌餞餘生新年倘有豐年喜買酒漁村看太平

攜瘦尊醉梅花下

楠癭作尊容斗許擁腫輪囷元媚媼肯從放翁來住山
誰云置身不得所山房寂寞久不飲作意欲就梅花語
我病鮮歡花更甚日暮淒涼泣殘雨人生萬事雲茫茫
一醉常恐俗物妨正須仙人冰雪膚來伴老子鐵石腸
花前起舞花底卧花影漸東山月墮瘦尊未竭狂未休
笑起題詩識吾過

城西接待院後竹下作

水邊小邱因古城上有巨竹數百箇一徑蛇蟠不容脚
平處乃可十客坐裊裊共看風枝舞藪藪時聽春籜墮
古佛不粧香火冷瘦僧如腊袈裟破門前西去長安路
日夜舳艫銜尾過老夫本乏臺省姿且就清陰曲肱卧

幽居春夜

暮景催人雪鬢雙十年始復反吾邦雲逢佳月每避舍
酒壓閑愁如受降三弄笛聲初到枕一枝梅影正橫牕
要知清夢遊何許不釣桐江即錦江

金
卷四十四
頸聯圓妙有彈丸脫手之樂

晨起

小雨濕清曉新鶯啼早春年光驚病眼節物屬閑身
巴
破東連楚嶠山北控秦遠遊端可繼敢恨素衣塵

春遊

平生樂行役不耐常閉戶今朝新雨霽一笑整巾屨青
猿導幽蹊春草伴微步雖云尊酒薄蔬果亦畧具辛夷
發高枝楊柳吹墮絮行歌不知遠落日呼野渡橫林已

棲鴉淺水猶立鷺歸來意頗豪古錦有新句

八月十四日夜湖山觀月

長空露洗玻璃碧紫金之盤徑三尺忽看擘地出人間
桂樹扶疎如淡墨攬衣獨立鏡湖邊風露萬頃秋渺然
開帆詎必入東海騎鯨便可追飛仙冰壺玉瀝侵骨冷
醉看孤鸞舞清影夜闌歸舍人已眠却倩天風為吹醒
奇語得自眼前轉覺出人意表

夜聞秋風感懷

西風一夜號庭樹起攬戎衣淚濺襟殘角聲催關月墮
斷鴻影隔塞雲深數篇零落從軍作一寸淒涼報國心
莫倚壯圖思富貴英豪何限死山林

草書歌

傾家釀酒三千石閑愁萬斛酒不敵今朝醉眼爛巖電
提筆四顧天地窄忽然揮掃不自知風雲入懷天借力
神龍戰野昏霧腥奇鬼摧山太陰黑此時驅盡胸中愁
槌牀大叫狂墮幘吳牋蜀素不快人付與高堂三尺壁

與醉後草書一篇各成竒致

夜泊水村

腰間羽箭久凋零太息燕然未勒銘老子猶堪絕大漠
諸君何至泣新亭一身報國有萬死雙鬢向人無再青
記取江湖泊船處卧聞新雁落寒汀
率多胸臆兼有氣骨可為南渡君臣慨然太息

自妙相歸將至杜浦堰舟中作

斜陽發東郭初夜轉西城寺閣踈鐘動漁村遠火明蒼

茫林靄滅撲漉水禽驚漸喜吾廬近遙聞過埭聲

御選唐宋詩醇卷四十四